

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI KHAMIS, 17 MAC 2016, PUKUL 10.00 PAGI

Bil. 8

PERTANYAAN-PERTANYAAN BAGI JAWAB LISAN

1. PR-1341-L72384
Datuk Juslie bin Ajirol [Libaran] minta **MENTERI PENGANGKUTAN** menyatakan keberkesanan kadar saman trafik atau penguatkuasaan sistem mata *demerit* kesalahan jalan raya dan AES bagi mendidik pemandu menjadi lebih berhemah di jalan raya.
2. PR-1341-L72674
Tuan Shamsul Iskandar bin Mohd Akin [Bukit Katil] minta **MENTERI PENDIDIKAN TINGGI** menyatakan secara terperinci statistik graduan yang mengganggu sehingga Februari 2016 dan langkah-langkah berkesan yang telah, sedang dan akan dijalankan Kementerian bagi memastikan graduan Malaysia memperoleh pekerjaan dan kekal berdaya saing di dalam pasaran kerja tempatan.
3. PR-1341-L73001
Puan Rubiah binti Haji Wang [Kota Samarahan] minta **MENTERI PEMBANGUNAN WANITA, KELUARGA DAN MASYARAKAT** menyatakan berapakah jumlah usahawan wanita luar bandar yang telah berjaya dicapai oleh Kementerian dan apakah usaha untuk membangunkan wanita luar bandar terutamanya.
4. PR-1341-L71712
Dato' Kamarul Baharin bin Abbas [Telok Kemang] minta **MENTERI KEMAJUAN LUAR BANDAR DAN WILAYAH** menyatakan :-
 - (a) tindakan susulan Kerajaan dalam membantu lebih 20 ribu usahawan yang menurut rekod Kementerian telah terlibat dalam aktiviti penjana ekonomi di RTC (Rural Transformation Centre) dibawah 8 inisiatif NBOS4; dan
 - (b) berapakah jumlah bantuan kewangan yang diberikan kepada lebih 20 ribu usahawan terlibat.

5. PR-1341-L72969
Dato' Ir. Haji Nawawi bin Ahmad [Langkawi] minta **MENTERI SUMBER ASLI DAN ALAM SEKITAR** menyatakan perancangan pihak Kementerian dalam mempelbagaikan lagi kajian dalam meningkatkan penggunaan teknologi biomas yang dapat mengurangkan pencemaran alam sekitar di samping dapat menjana pendapatan rakyat yang ingin menceburi bidang teknologi biomas tersebut.
6. PR-1341-L73578
Tuan Er Teck Hwa [Bakri] minta **MENTERI KOMUNIKASI DAN MULTIMEDIA** menyatakan lokasi perkhidmatan pos bergerak yang telah dijalankan, akan dijalankan dan tidak mendapat sambutan mengikut tahun dari 2011 hingga 2016.
7. PR-1341-L72067
Dato' Haji Mohd Fasih bin Haji Mohd Fakeh [Sabak Bernam] minta **MENTERI PENDIDIKAN** menyatakan sejauh manakah langkah Kerajaan melaksanakan tranformasi Kurikulum Standard Sekolah Rendah (KSSR) yang digantikan dengan KSSR (semakan) dan Kurikulum Bersepadu Sekolah Menengah yang digantikan dengan Kurikulum Standard Sekolah Menengah (KSSM) sebagai penambahbaikan kurikulum sedia ada dapat memastikan murid terus memperoleh pengetahuan, kemahiran dan nilai yang relevan dengan keperluan abad ke-21 seterusnya mampu menghadapi cabaran global pada masa akan datang serta menyumbang kepada negara.
8. PR-1341-L72903
Tuan Sim Chee Keong [Bukit Mertajam] minta **MENTERI SUMBER MANUSIA** menyatakan statistik pemberhentian kerja (*retrenchment*) setiap tahun dari 2005 -2015, ikut pecahan industri, kurungan umur, gender, kaum, negeri, kurungan gaji, tahap pengajian. Apakah strategi kerajaan untuk membantu para penganggur.
9. PR-1341-L71964
Dr. Mansor bin Abd Rahman [Sik] minta **MENTERI KEWANGAN** menyatakan berapa jumlah permohonan yang diterima Syarikat Perumahan Negara Berhad (SPNB) untuk membina rumah mampu milik di peringkat nasional dan Parlimen Sik dan dari jumlah tersebut berapakah jumlah yang telah siap dibina, masih dalam pembinaan dan terbengkalai (juga pada peringkat nasional dan Parlimen Sik) sejak SPNB ditubuhkan.
10. PR-1341-L72215
Tuan Haji Nasrudin bin Hassan [Temerloh] minta **MENTERI PERDAGANGAN ANTARABANGSA DAN INDUSTRI** menyatakan unjuran masa hadapan Proton dalam ketidaktentuan ekonomi negara.
11. PR-1341-L72477
Puan Hajah Normala binti Abdul Samad [Pasir Gudang] minta **MENTERI PENDIDIKAN TINGGI** menyatakan tindakan yang diambil oleh Kementerian dalam mengawal harga makanan di institusi pengajian tempatan berikutan sejak kebelakangan isu penuntut universiti yang sering dibangkitkan di media massa.

12. PR-1341-L71750
Dr. Azman bin Ismail [Kuala Kedah] minta **MENTERI KESIHATAN** menyatakan tentang panduan pemakanan terbaru dari Kementerian yang menggantikan Piramid Makanan Malaysia.
13. PR-1341-L72813
Datuk Raime bin Unggi [Tenom] minta **MENTERI PERDAGANGAN ANTARABANGSA DAN INDUSTRI** menyatakan menerusi pemeteraian Perjanjian Perkongsian Trans-Pasifik (TPPA), setakat mana penawaran akses pasaran yang lebih luas kepada pengeksport dan setakat mana berpotensi mewujudkan industri baharu.
14. PR-1341-L72075
Tan Sri Dato' Seri Abd Khalid bin Ibrahim [Bandar Tun Razak] minta **MENTERI KEWANGAN** menyatakan sejak pelaksanaannya pada April 2015, perincian kutipan GST mengikut negeri, kos operasi yang terlibat, perancangan membuat pengumuman awam secara berkala serta pelan tindakan bagaimana dan ke mana hasil cukai ini akan dibelanjakan, berteraskan konsep belanjawan telus, bertanggungjawab dan berhemat.
15. PR-1341-L73428
Datuk Wira Haji Ahmad bin Hamzah [Jasin] minta **MENTERI KEWANGAN** menyatakan dalam keadaan yang masih berterusan tidak menentu ini, apakah langkah proaktif Kerajaan untuk menangani situasi ekonomi jika ia bertambah buruk, seperti harga minyak mentah menjunam ke paras US\$10-US\$15 setong.
16. PR-1341-L72547
Tuan Manivanan a/l Gowindasamy [Kapar] minta **MENTERI KESIHATAN** menyatakan :-
- (a) apakah perkembangan dan status terkini pembinaan hospital di Parlimen Kapar setelah lokasi tanah telah dimaklumkan oleh Kerajaan Negeri Selangor. Apakah perkembangan secara terperinci yang telah berlaku dalam tempoh masa 1 Januari 2015 sehingga 29 Februari 2016 dan bilakah Kerajaan Pusat berhasrat untuk memulakan pembinaan hospital di Parlimen Kapar; dan
 - (b) apakah perkembangan dan status terkini mengenai proses penambahbaikan Klinik Kesihatan Kapar Baru yang akan menggantikan klinik kesihatan lama di bawah RP3, RMK-10. Apakah perkembangan secara terperinci yang telah berlaku dalam tempoh masa 1 Januari 2015 sehingga 29 Februari 2016.
17. PR-1341-L72208
Dato' Ahmad Fauzi bin Zahari [Setiawangsa] minta **MENTERI WILAYAH PERSEKUTUAN** menyatakan berapakah jumlah rumah mampu milik yang telah siap untuk diduduki dan berapa jumlah keseluruhan yang akan dibina dan di kawasan mana.

18. PR-1341-L72090
Raja Dato' Kamarul Bahrin Shah [Kuala Terengganu] minta **MENTERI PENDIDIKAN** menyatakan tidakkah Kementerian bercadang untuk mengambil sikap lebih bertimbang rasa dan "*Compassionate*" melalui pendekatan terhadap masalah-masalah kewangan pelajar-pelajar memandangkan pemotongan yang banyak peruntukan pendidikan dan potongan besar bantuan murid-murid miskin.
19. PR-1341-L72000
Datuk Joseph Salang anak Gandum [Julau] minta **MENTERI PENDIDIKAN** menyatakan langkah-langkah dan tindakan yang diambil untuk memenuhi kehendak persefahaman antara YAB Perdana Menteri dan YAB Ketua Menteri Sarawak yang mana tidak kurang dari 90% daripada kesemua guru yang mengajar di sekolah-sekolah di Sarawak menjelang tahun 2018 adalah terdiri dari anak tempatan.
20. PR-1341-L72704
Tuan Teo Kok Seong [Rasah] minta **MENTERI SUMBER ASLI DAN ALAM SEKITAR** menyatakan :-
 - (a) di manakah kilang nadir bumi Lynas membuang sisa toksik; dan
 - (b) mengapakah Pusat Kualiti Alam, Bukit Nenas di Negeri Sembilan dibenarkan untuk memproses sisa toksik/radioaktif dari Lynas.
21. PR-1341-L73472
Tuan Haji Ahmad Nazlan bin Idris [Jerantut] minta **MENTERI KEMAJUAN LUAR BANDAR DAN WILAYAH** menyatakan projek bekalan air bersih turut diberi penekanan RMK-11, justeru apakah projek bekalan air luar bandar yang sedang dilaksanakan Kementerian, khususnya di kawasan Jerantut dan status terkini pelaksanaan projek tersebut.
22. PR-1341-L72225
Tuan Wan Hasan bin Mohd Ramli [Dungun] minta **MENTERI PENDIDIKAN** menyatakan adakah Kerajaan bertanggungjawab pembayaran utiliti bagi Sekolah Agama Bantuan Kerajaan seluruh negeri Terengganu.
23. PR-1341-L73355
Dato' Ar. Wan Mohammad Khair-il Anuar bin Wan Ahmad [Kuala Kangsar] minta **MENTERI PENDIDIKAN** menyatakan apakah benar Kementerian telah menjadikan Program Latihan Dalam Perkhidmatan (LDP) kepada para guru sebagai latihan yang bersifat pilihan dan bukannya bersifat wajib. Jika benar, nyatakan rasionalnya.

24. PR-1341-L71978
Puan Teresa Kok Suh Sim [Seputeh] minta **MENTERI PENDIDIKAN** menyatakan langkah Kerajaan untuk meningkatkan mutu Bahasa Inggeris di kalangan pelajar sekolah. Apakah Kementerian akan mewajibkan kelulusan Bahasa Inggeris bersama Bahasa Malaysia di peringkat SPM, dan sekurang-kurangnya gred C di peringkat PMR, bagi mengatasi masalah kelemahan penguasaan Bahasa Inggeris di negara ini.
25. PR-1341-L73332
Dato' Othman bin Aziz [Jerlun] minta **MENTERI TENAGA, TEKNOLOGI HIJAU DAN AIR** menyatakan perancangan Kementerian dalam Program Kecekapan Tenaga yang mensasarkan pengurangan 8% penggunaan elektrik di negara ini. Sejauh manakah program ini diaplikasikan di tempat rekreasi dan tumpuan awam.
26. PR-1341-L71777
Tuan M. Kulasegaran [Ipoh Barat] minta **MENTERI PENDIDIKAN** menyatakan :-
- (a) jumlah pelajar yang telah mendaftar untuk melanjutkan pengajian ke matrikulasi dan berikan pecahan mengikut kaum masing-masing; dan
 - (b) bilakah kouta pengambilan pelajar akan dilaksanakan berdasarkan merit.
27. PR-1341-L73273
Tuan Haji Hasbi bin Haji Habibollah [Limbang] minta **MENTERI DALAM NEGERI** menyatakan apakah status terkini perundingan pihak Kerajaan dengan Kerajaan Negara Brunei untuk membuka sebuah CIQ baru di Pandan, Limbang, Sarawak (Malaysia) dan Lumapas (Brunei) untuk di "synchronize" dengan pembinaan jambatan baru merentangi Sungai Limbang yang akan bermula tidak lama lagi.
28. PR-1341-L72443
Tuan Chong Chieng Jen [Bandar Kuching] minta **MENTERI PENDIDIKAN** menyatakan sama ada Kerajaan Negeri Sarawak ada bercadang agar pemulihan penggunaan Bahasa Inggeris sebagai bahasa pengantaraan untuk pengajaran semua matapelajaran di sekolah-sekolah mubaligh (*mission*) di Negeri Sarawak. Apakah pendirian Kerajaan Persekutuan terhadap cadangan tersebut.
29. PR-1341-L71767
Datuk Wee Jeck Seng [Tanjong Piai] minta **MENTERI DALAM NEGERI** menyatakan apakah bilangan penagih dadah semakin tinggi walaupun AADK melaksanakan kempen dan mengambil langkah-langkah lain menangani isu ini.

30. PR-1341-L72653
Dato' Ngeh Koo Ham [Beruas] minta **MENTERI DALAM NEGERI** menyatakan kenapa pendaftaran pekerja-pekerja asing tanpa izin yang bermula pada 14 Februari 2016 tidak boleh dibuat terus kepada Jabatan Imigresan tetapi mesti melalui orang tengah iaitu 2 syarikat yang ditetapkan oleh pihak Kerajaan yang mengenakan caj pendaftaran RM800 dan caj pentadbiran RM400 untuk setiap pekerja.

31. PR-1341-L72705
Dato' Abd. Aziz bin Haji Sheikh Fadzir [Kulim Bandar Baharu] minta **MENTERI PENDIDIKAN TINGGI** menyatakan dalam Pelan Pembangunan Pendidikan Malaysia (Pendidikan Tinggi), kedudukan *ranking* IPTA dan IPTS negara merupakan antara intipati utama. Apakah pelan jangka pendek dan panjang Kementerian dalam menaikkan ranking IPTA dan IPTS negara ke tahap lebih tinggi. Bagaimanakah Kementerian dapat memastikan IPTA dan IPTS ini dapat kekal bersaing tatkala peruntukan untuk universiti awam tempatan dikurangkan.

32. PR-1341-L73014
Tuan Wong Sze Phin @ Jimmy [Kota Kinabalu] minta **MENTERI PENGANGKUTAN** menyatakan status terkini rancangan atau dasar Kerajaan bagi menyelesaikan masalah ketidakseimbangan harga barang antara Timur dan Barat Malaysia yang disebabkan oleh kos pengangkutan yang tinggi seperti Dasar Kabotaj. Apa lagi usaha Kerajaan di bawah Kementerian Pengangkutan dalam menyeragamkan harga seluruh negara.

33. PR-1341-L72152
Dr. Michael Jeyakumar Devaraj [Sungai Siput] minta **MENTERI DALAM NEGERI** menyatakan bilangan majikan yang telah didakwa atas kesalahan menggaji pekerja asing tanpa izin dalam tahun 2014 dan 2015 dengan pecahan bilangan majikan yang didapati bersalah dan bilangan majikan yang dipenjarakan.

34. PR-1341-L73513
Datuk Koh Nai Kwong [Alor Gajah] minta **MENTERI DALAM NEGERI** menyatakan apakah bentuk pangkalan data atau sistem pendaftaran pelaku seksual yang dirangka oleh Kementerian dan senarai indikator yang menjadi ukuran penentuan dalam pangkalan data dan sistem ini.

35. PR-1341-L73097
Tuan William Leong Jee Keen [Selayang] minta **PERDANA MENTERI** menyatakan status dan kemajuan Pelan Induk Pengangkutan Awam Darat Greater Kuala Lumpur/Klang Valley dan sebab-sebab kemerosotan dalam pengangkutan awam.

36. PR-1341-L71654
Dr. Noor Azmi bin Ghazali [Bagan Serai] minta **MENTERI KEMAJUAN LUAR BANDAR DAN WILAYAH** menyatakan apakah insentif atau bantuan lain yang boleh diberikan dari segi pendidikan perniagaan memandangkan Bank MARA yang bakal ditubuhkan dikatakan boleh membantu Usahawan MARA dengan penyediaan dana dan pinjaman untuk memajukan serta mengembangkan perniagaan.

37. PR-1341-L72590
Puan Alice Lau Kiong Yieng [Lanang] minta **PERDANA MENTERI** menyatakan kesan pemotongan biasiswa JPA yang diumumkan baru-baru ini dan berapakah jumlah pelajar dari Sarawak dipengaruhi oleh keputusan tersebut serta apakah langkah Kerajaan untuk menolong pelajar yang tidak mampu tetapi berhasrat untuk melanjutkan pelajaran mereka di luar negara.
38. PR-1341-L73601
Dato' Sri Hasan bin Malek [Kuala Pilah] minta **MENTERI SUMBER MANUSIA** menyatakan apakah pihak Kementerian ada menetapkan nisbah peratusan pekerja warga tempatan dan warga asing di dalam sesebuah syarikat yang berhasrat untuk menggaji pekerja asing. Ini dilihat sebagai perlu dibendung kerana dikhuatiri akan menjejaskan peluang warga tempatan untuk mencari pekerjaan.
39. PR-1341-L71641
Datuk Seri Panglima Haji Abdul Ghapur bin Haji Salleh [Kalabakan] minta **PERDANA MENTERI** menyatakan apakah anggota keselamatan di bawah ESSCOM sudah dibekalkan dengan bot-bot laju berkuasa tertinggi agar dapat menjadi lebih berkesan dan digeruni.
40. PR-1341-L73435
Dato' Haji Mahfuz bin Omar [Pokok Sena] minta **MENTERI KERJA RAYA** menyatakan :-
- (a) apakah kaedah perolehan projek tender terhad di dalam projek JKR, bagaimana proses pemilihan pentender, apakah kriteria yang ditetapkan; dan
 - (b) apakah pemilihan berdasarkan cadangan dan tapisan oleh JKR, jika bukan pihak manakah yang menentukan keputusan muktamad pemilihan.
41. PR-1341-L72014
Tuan Anyi Ngau [Baram] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan bilangan "Points of Sale" (POS) yang terlibat dengan subsidi harga barangan di kawasan luar bandar di Sarawak amnya dan di kawasan Baram khasnya. Nyatakan cabaran-cabaran serta tindakan pihak Kementerian untuk tangani cabaran-cabaran tersebut.
42. PR-1341-L73279
Tuan Gooi Hsiao-Leung [Alor Setar] minta **MENTERI DALAM NEGERI** menyatakan kenapa Kerajaan telah menunggu sehingga Disember 2015 untuk mengesahkan bahawa rekod-rekod imigresen Altantuya Shaariibuu yang dibunuh, masih ada di dalam sistem, dan tidak dipadamkan seperti didakwa 8 tahun dahulu.

43. PR-1341-L71982
Tuan Ng Wei Aik [Tanjong] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan bilakah Mahkamah Tribunal Perumahan dan Pengurusan Strata Zon Utara Pulau Pinang di Tingkat 8 Bangunan Mara akan mulai digunakan. Bagaimana menentukan sama ada kes-kes tertentu akan diadakan pendengarannya di Mahkamah TPPS tersebut.
44. PR-1341-L73012
Dato' Seri Tiong King Sing [Bintulu] minta **MENTERI KOMUNIKASI DAN MULTIMEDIA** menyatakan :-
- (a) apakah pihak Kementerian mempunyai rancangan untuk mempercepatkan penyambungan perkhidmatan telefon bimbit memandangkan menara telekomunikasi telah wujud di beberapa tempat kawasan pedalaman di Bintulu; dan
 - (b) adakah pihak Kementerian mempunyai rancangan untuk memperluaskan perkhidmatan jalur lebar di kawasan Bintulu terutamanya di kawasan luar bandar dalam masa terdekat ini supaya rakyat dapat terdedah kepada perkembangan isu semasa.
45. PR-1341-L72383
Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan jumlah deposit yang telah dibayar oleh consortium Iskandar Waterfront (IWH) dengan China Railway untuk membeli 60% Bandar Malaysia. Adakah deposit ini “*refundable*” dan adakah IWH mampu membayar RM7.4 bilion walaupun nilai aset bersih IWH adalah tidak sampai RM3.5 bilion.
46. PR-1341-L71670
Tuan Wilson Ugak Kumbong [Hulu Rajang] minta **MENTERI PENDIDIKAN** menyatakan usaha Kementerian untuk menyelesaikan masalah kekurangan tenaga pengajar di sekolah-sekolah menengah seperti berikut di Bahagian Kapit iaitu ;
- (a) SMK Selirik kekurangan 18 tenaga pengajar; dan
 - (b) SMK Kapit kekurangan 20 tenaga pengajar dan SMK Baleh kekurangan 1 tenaga pengajar.
47. PR-1341-L72462
Ust. Datuk Dr. Mohd. Khairuddin bin Aman Razali [Kuala Nerus] minta **MENTERI PERTANIAN DAN INDUSTRI ASAS TANI** menyatakan skim-skim perlindungan yang ditawarkan atau diberikan kepada petani atau peladang dan nelayan yang mengalami kerugian akibat bencana alam dan juga kegiatan perlombongan seperti bauksit di Kuantan.

48. PR-1341-L73227
Datuk Rozman bin Isli [Labuan] minta **MENTERI DALAM NEGERI** menyatakan apakah langkah-langkah terkini yang diambil oleh Jabatan Imigresen dalam memantau perjalanan keluar masuk pelawat yang melalui Labuan. Ini bagi memastikan setiap pergerakan pelawat dapat dipantau.
49. PR-1341-L72315
Datuk Noor Ehsanuddin bin Mohd Harun Narrashid [Kota Tinggi] minta **MENTERI DALAM NEGERI** menyatakan sejauh manakah tahap kesiapan siagaan dalam menangani ancaman serangan senjata biologi seperti penggunaan gas sarin dan kuman antrax oleh kumpulan pengganas seperti militan DAESH, militan Suluk, kumpulan Abu Sayaf dan sebagainya yang boleh mengancam keselamatan negara.
50. PR-1341-L72181
Datuk Mohd Idris bin Jusi [Batu Pahat] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan setakat mana berkesannya langkah-langkah yang dijalankan oleh Kementerian mengawal dan menurunkan harga barang keperluan harian rakyat.
51. PR-1341-L73071
Tuan Mohamed Hanipa bin Maidin [Sepang] minta **MENTERI DALAM NEGERI** menyatakan :-
- (a) bilakah Kerajaan akan membina sebuah balai polis di Taman Putra Perdana dan dimanakah ia akan dibina dan berapakah jumlah kadar jenayah di Taman Putra Perdana sahaja dari tahun 2013, 2014, 2015 dan 2016 kategori jenayah-jenayah tersebut.; dan
 - (b) berapakah jumlah kadar jenayah yang telah berlaku bagi Parlimen Sepang bagi tahun 2013, 2014, 2015 dan 2016 dan berikan butiran 5 yang paling tinggi kadar jenayah mengikut urutannya.
52. PR-1341-L73589
Tuan Oscar Ling Chai Yew [Sibü] minta **MENTERI DALAM NEGERI** menyatakan apakah peranan yang dimainkan oleh Syarikat Real Time Networking dalam isu 1.5 juta pekerja Bangladesh. Dalam sektor mana, mereka ini ditempatkan dan mengapa Kerajaan tidak mengadakan dasar terbuka supaya pekerja tidak mengira negara asal mereka dibenarkan diambil bekerja.
53. PR-1341-L71929
Dato' Mansor bin Othman [Nibong Tebal] minta **MENTERI PENDIDIKAN TINGGI** menyatakan berapakah jumlah kolej komuniti yang berdaftar dan beroperasi aktif di Malaysia mengikut negeri dan kawasan Parlimen.

54. PR-1341-L73143
Datuk Liang Teck Meng [Simpang Renggam] minta **MENTERI PERTANIAN DAN INDUSTRI ASAS TANI** menyatakan sejauh manakah pembangunan industri nanas di Johor dan apakah langkah (*proactive action*) yang diambil oleh Kementerian dalam mengekalkan industri ini.
55. PR-1341-L72854
Ir. Shaharuddin bin Ismail [Kangar] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan apakah tindakan yang telah diambil oleh Kementerian sehingga Januari 2016 bagi peniaga secara dalam talian atau "online" yang masih belum atau enggan mendaftarkan perniagaannya dengan Suruhanjaya Syarikat Malaysia (SSM).
56. PR-1341-L72354
Dr. Hajah Siti Mariah binti Mahmud [Kota Raja] minta **MENTERI DALAM NEGERI** menyatakan jumlah sumbangan levi permit kerja dari pekerja asing dari tahun 2011 sampai 2015 mengikut sektor ekonomi dan negara asal pekerja asing. Apakah justifikasi Kerajaan meningkatkan bayaran levi pekerja asing.
57. PR-1341-L73219
Tuan Ahmad Marzuk bin Shaary [Bachok] minta **PERDANA MENTERI** menyatakan jumlah kes jenayah seksual yang melibatkan ajaran sesat sejak 1980. Apakah Kerajaan telah berjaya membendung ajaran ajaran sesat ini. Apakah pula ajaran sesat baru yang dikesan muktakhir ini.
58. PR-1341-L73086
Dato' Dr. Mujahid Yusof Rawa [Parit Buntar] minta **MENTERI KEWANGAN** menyatakan jumlah kutipan Cukai GST setelah dilaksanakan sehingga kini dan jumlah kutipan mengikut negeri-negeri setiap bulan.
59. PR-1341-L72127
Tuan Su Keong Siong [Ipoh Timor] minta **MENTERI SUMBER MANUSIA** menyatakan secara terperinci rancangan Kerajaan untuk membenarkan dan/atau mmbawa masuk 1.5 juta pekerja asing dari Bangladesh ke Malaysia. Apakah tindakan yang diambil untuk menyelesaikan masalah pendatang asing tanpa izin (PATI) di Malaysia dan keberkesanannya.
60. PR-1341-L72618
Puan Kasthuriraani a/p Patto [Batu Kawan] minta **MENTERI KESIHATAN** menyatakan bilangan kegunaan "*stainless steel*" berbanding titanium di hospital Kerajaan dan bagi implan dalaman dan jika Kerajaan akan berhenti menggunakan "*stainless steel*" memandangkan ia akan memudaratkan kesihatan pesakit yang mempunyai bahan "*stainless steel*" dalam badan mereka.
61. PR-1341-L73037
Tuan Loke Siew Fook [Seremban] minta **MENTERI DALAM NEGERI** menyatakan apakah kos atau pampasan yang perlu ditanggung oleh Kerajaan terhadap Syarikat Ultra Kinrara Sdn. Bhd. yang mengendalikan permohonan visa Malaysia di China ekoran daripada keputusan Kerajaan untuk mengecualikan visa kepada pelancong-pelancong dari China bermula 1 Mac hingga 31 Disember tahun ini.

62. PR-1341-L73476
Datuk William @ Nyallau anak Badak [Lubok Antu] minta **MENTERI KEMAJUAN LUAR BANDAR DAN WILAYAH** menyatakan adakah kementerian memperuntukkan sejumlah bajet dalam menaiktaraf jalan balak khususnya di jalan Ulu Lemanak dan jalan balak ke Ulu Engkari.
63. PR-1341-L72634
Puan Nurul Izzah binti Anwar [Lembah Pantai] minta **MENTERI SUMBER MANUSIA** menyatakan :-
- (a) jumlah bayaran kepada Ketua Pengarah Eksekutif dan Lembaga Pengarah Human Resource Development Fund, HRDF; dan
 - (b) rasional pewujudan syarikat persendirian dan tahap kejayaan mencapai sasaran RMK-11 untuk melatih 28 hingga 35 peratus pekerja.
64. PR-1341-L71924
Datuk Linda Tsen Thau Lin [Batu Sapi] minta **MENTERI PERDAGANGAN ANTARABANGSA DAN INDUSTRI** menyatakan bagaimana untuk membantu meningkatkan perniagaan terutamanya di Sabah yang telah mengalami kemerosotan akibat daripada kelembapan ekonomi.
65. PR-1341-L72714
Tuan Sim Tong Him [Kota Melaka] minta **PERDANA MENTERI** menyatakan :-
- (a) terdapat berapa buah projek perumahan PR1MA sudah dilaksanakan di Melaka, dan lokasinya dan harga tawaran dan juga jenis pembinaan; dan
 - (b) berapa buah projek masih dalam perancangan.
66. PR-1341-L73539
Dato' Seri Mohamed Azmin bin Ali [Gombak] minta **MENTERI LUAR NEGERI** menyatakan langkah-langkah Kerajaan bagi memantau dan mengikis campur tangan asing termasuk China dan Amerika Syarikat ke dalam kedaulatan wilayah ASEAN termasuk di Laut China Selatan.
67. PR-1341-L73253
Tuan Nik Mohamad Abduh bin Nik Abdul Aziz [Pasir Mas] minta **MENTERI KERJA RAYA** menyatakan status pembinaan jambatan kedua Salor-Pasir Mas dan jalanraya Pasir Mas-Rantau Panjang.
68. PR-1341-L73400
Dato' Fauzi bin Abdul Rahman [Indera Mahkota] minta **MENTERI DALAM NEGERI** menyatakan apakah benar bahawa pekerja asing di dalam negara telah menjangkau lebih 5.5 juta orang. Jika benar, berikan pecahan mereka mengikut negeri dalam negara yang mereka dibenarkan bekerja , pecahan kewarganegaraan atau negara asal dan jantina mereka. Jika tidak benar, berapakah jumlah sebenar pekerja asing dalam negara kini dan pecahan seperti diatas.

69. PR-1341-L73616
Tuan Haji Ahmad Lai bin Bujang [Sibuti] minta **MENTERI SUMBER MANUSIA** menyatakan apakah langkah yang telah difikirkan oleh pihak Kerajaan mengenai pembuangan pekerja sektor industri minyak dan gas yang kehilangan pekerjaan terutama di Bandar Raya Miri dan adakah Kerajaan mempunyai anggaran tempoh masa industri minyak ini akan pulih. Apakah usaha Kerajaan untuk membantu mereka.
70. PR-1341-L73630
Datuk Abd Rahim bin Bakri [Kudat] minta **MENTERI KEWANGAN** menyatakan langkah-langkah tambahan yang diambil oleh Kerajaan di dalam menghadapi penyusutan pendapatan negara dari hasil minyak dan gas yang mengalami penurunan harga yang mendadak ketika ini.
71. PR-1341-L71851
Dato' Johari bin Abdul [Sungai Petani] minta **PERDANA MENTERI** menyatakan :-
- (a) apabila Perdana Menteri menerima derma dari seorang penderma dari Timur Tengah yang berjumlah RM 2.6 billion, nyatakan bentuk instrumen kewangan yang digunakan bagi menghantar wang tersebut; dan
 - (b) berapa jumlah yang telah dipulangkan dan apa yang dilakukan terhadap wang yang berbaki.

PADA PERMULAAN URUSAN MESYUARAT
MENGEMUKAKAN RANG UNDANG-UNDANG KERAJAAN
UNTUK BACAAN KALI YANG PERTAMA

1. Menteri di Jabatan Perdana Menteri

- * Rang Undang-Undang Bekalan Gas (Pindaan) 2016.

* Menandakan bahawa Rang Undang-undang ini akan dibawa pada semua peringkat di mesyuarat ini.

ATURAN URUSAN MESYUARAT DAN USUL-USUL

1. **Usul dibuat oleh Yang Berhormat Tuan Haji Ahmad Lai bin Bujang [Sibuti] dan masalah dicadangkan :-**

“ Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Keempat, Parlimen Yang Ketiga Belas.”

Menyambung semula Perbahasan atas masalah (16 Mac, 2016)

- | | | | |
|----|----------------|--|-------------------------------|
| 2. | (D.R. 36/2015) | Rang Undang-undang Keselamatan Sosial Pekerja (Pindaan) 2015 | Bacaan Kali Yang Kedua |
| | | [Menteri Sumber Manusia] | |
| 3. | (D.R. 30/2015) | Rang Undang-undang Syarikat 2015 | “ |
| | | [Menteri Perdagangan Dalam Negeri, Koperasi dan Kepenggunaan] | |
| 4. | (D.R. 29/2015) | Rang Undang-undang Skim Kepentingan 2015. | “ |
| | | [Menteri Perdagangan Dalam Negeri, Koperasi dan Kepenggunaan] | |
| 5. | (D.R. 34/2015) | Rang Undang-undang Dadah Berbahaya (Langkah-Langkah Pencegahan Khas) (Pindaan) 2015. | “ |
| | | [Menteri Dalam Negeri] | |
| 6. | (D.R. 37/2015) | Rang Undang-undang Profesion Undang-undang (Pindaan) 2015 | “ |
| | | [Menteri di Jabatan Perdana Menteri] | |

7. (D.R. 39/2015) Rang Undang-undang Kanak-Kanak “
(Pindaan) 2015
**[Menteri Pembangunan Wanita,
Keluarga dan Masyarakat]**
8. (D.R.9/2015) Rang Undang-undang Kanun Tatacara “
Jenayah (Pindaan) 2015
[Menteri di Jabatan Perdana Menteri]
9. (D.R.12/2015) Rang Undang-undang Keterangan “
(Pindaan) 2015
[Menteri di Jabatan Perdana Menteri]
10. (D.R.35/2015) Rang Undang-undang Persaingan “
(Pindaan) 2015
**[Menteri Perdagangan Dalam Negeri,
Koperasi dan Kepenggunaan]**

11. PR-1341-U72985
Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa pembangunan infrastruktur di negeri Sabah masih jauh ketinggalan berbanding dengan negeri-negeri lain di Malaysia. Dan mengambil maklum juga bahawa negeri Sabah memerlukan lebih banyak dana demi untuk membangunkan kemudahan infrastruktur terutama sekali di kawasan luar bandar serta keperluan-keperluan lain seperti masalah tebatan banjir, projek perumahan rakyat termiskin dan lain-lain. Dan mengambil maklum juga bahawa rakyat negeri Sabah juga beraspirasi seperti rakyat negeri Sarawak, sepertimana yang dinyatakan oleh YAB Tan Sri Adenan Satem (Ketua Menteri Sarawak) ingin memohon agar royalti minyak dapat dinaikkan kepada kadar 20%. Dan mengambil maklum juga, sekiranya royalti minyak dinaikkan pada kadar 20%, maka dengan lebih dana tersebut, kerajaan negeri Sabah akan dapat melaksanakan keperluan-keperluan di atas dengan lebih baik dan cepat lagi. Maka, bagi meredakan rungutan dan tuntutan rakyat negeri Sabah, maka Dewan yang mulia ini hendaklah mengambil ketetapan bahawa Kerajaan Malaysia menaikkan kadar royalti minyak bagi negeri Sabah kepada kadar 20% dan sekaligus membolehkan negeri Sabah membangun dengan lebih pesat lagi."

[Perdana Menteri]

12. PR-1341-U73002

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kesesakan Jalan Putatan merupakan rungutan hampir setiap pengguna jalan tersebut. Dan mengambil maklum juga bahawa Jalan Putatan merupakan sebahagian daripada rangkaian Jalan Pan Borneo Highway yang mana sepatutnya mendapat perhatian utama dan bebas kesesakan. Dan mengambil maklum juga, bahawa kesesakan Jalan Putatan juga disebabkan rekabentuk yang kurang baik di mana terdapat terlalu banyak U-Turn dan simpang, yang menjadi penyebab utama kelancaran aliran trafik selain menjadi punca kemalangan. Dan mengambil maklum juga, bahawa kesesakan Jalan Putatan dapat diatasi dengan membina sebatang Jalan Pantai (Coastal Highway) alternatif yang menghubungkan pekan Tanjung Aru dengan Pekan Kinarut. Dan mengambil maklum juga bahawa, sekiranya jalan pantai alternatif yang dimaksudkan dibina, ianya juga boleh membantu untuk mengelakkan hakisan pantai di sepanjang laluan tersebut. Dan mengambil maklum juga bahawa, untuk membina jalan baru sebagai laluan alternatif bagi Jalan Putatan akan menelan belanja yang besar terutama sekali bagi tujuan pampasan tanah yang dilalui. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah membina jalan pantai alternatif bagi Jalan Putatan demi untuk keselesaan rakyat yang menggunakan laluan tersebut."

[Menteri Kerja Raya]

13. PR-1341-U73023

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa keengganan Kerajaan Persekutuan untuk mengiktiraf keputusan Peperiksaan Unified Examination Certificate (UEC) telah menimbulkan banyak kontroversi dan masalah terutama sekali kepada pelajar dan ibu/bapa pelajar yang terlibat. Dan mengambil maklum juga bahawa Negeri Sarawak merupakan negeri pertama di negara ini yang mengiktiraf keputusan peperiksaan UEC sepertimana yang diumumkan oleh YAB Tan Sri Adenan Satem dan sekali gus membolehkan pelajar terlibat meneruskan pengajian mereka dengan tanpa halangan di negeri Sarawak, misalnya di Universiti Malaysia Sarawak. Dan mengambil maklum juga bahawa dengan keengganan Kerajaan Malaysia untuk mengiktiraf keputusan peperiksaan UEC, pelajar yang terlibat terpaksa meneruskan pendidikan mereka di luar negara dan seterusnya bekerja serta menetap di luar negara adalah merupakan kerugian besar negara sebagaimana yang ditekankan oleh YAB Ketua Menteri Sarawak. Dan mengambil maklum juga, bahawa ramai pelajar dan ibu/bapa menganggap bahawa polisi untuk tidak mengiktiraf keputusan peperiksaan UEC ini bersifat diskriminasi di mana pelajar tersebut tidak berpeluang untuk berkhidmat dengan sektor awam di Malaysia.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah mengiktiraf keputusan peperiksaan Unified Examination Certificate bagi membolehkan pelajar yang terlibat meneruskan pendidikan mereka di negara ini serta berkhidmat di sektor awam di negara ini."

[Menteri Pendidikan]

14. PR-1341-U73036

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kualiti air Sungai Sembulan adalah amat tercemar dan tidak sihat sama ada bagi hidupan marin mahupun bagi ekosistem marin negara ini. Dan mengambil maklum juga bahawa Sungai Sembulan merupakan rangkaian akhir aliran air dari beberapa siri saliran dan parit daripada beberapa taman perumahan yang berpenduduk padat, sebelum aliran air dilepaskan ke laut. Dan mengambil maklum juga bahawa kebanyakan sistem merawat air kumbahan yang ada di kawasan perumahan yang terlibat tidak lagi efisien untuk merawat air kumbahan tersebut sebelum dilepaskan ke saliran-saliran atau parit-parit yang akhirnya mengalir ke Sungai Sembulan sebelum berakhir ke laut. Dan mengambil maklum juga bahawa sebahagian besar terumbu karang di sekitar perairan negeri Sabah telah musnah disebabkan oleh aktiviti manusia seperti pelepasan air kumbahan yang tidak terawat ke laut. Diketahui bahawa kemusnahan terumbu karang (Coral Bleaching) merupakan satu daripada penyebab utama pemanasan global. Dan mengambil maklum juga bahwa negara Malaysia adalah merupakan salah sebuah negara penyokong dan pendokong gerakan United Nation Environment Programme (UNEP) sesuai dengan deklarasi Global Climate Change Conference, Copenhagen 2009. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah menyediakan satu dana khas bagi tujuan pembinaan loji rawatan air kumbahan di sekitar Sungai Sembulan sebelum air sungai tersebut dilepaskan ke laut bagi menyelamatkan ekosistem laut negara ini."

[Menteri Sumber Asli dan Alam Sekitar]

15. PR-1341-U71877

Tuan M. Kulasegaran [Ipoh Barat] akan mencadangkan:-

"Bahawa Dewan ini hendaklah mengambil maklum bahawa rang undang-undang harus digubal untuk mengelakkan kes penukaran agama kanak-kanak di bawah umur secara unilateral dengan adanya penguatkuasaan undang-undang yang sewajarnya serta berpadanan dengan nasihat Kabinet pada 2009 iaitu kanak-kanak dikekalkan agama asal mereka sebelum penukaran agama itu berlaku."

[Perdana Menteri]

16. PR-1341-U73419

Dr. Tan Seng Giaw [Kepong] akan mencadangkan:-

"Bahawa Dewan akan membincangkan keberkesanan Malaysia mencegah serangan ganas."

[Menteri Dalam Negeri]

17. PR-1341-U71858

Tuan Fong Kui Lun [Bukit Bintang] akan mencadangkan:-

"Bahawa Kerajaan mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia."

[Perdana Menteri]

18. PR-1341-U71862

Tuan Fong Kui Lun [Bukit Bintang] akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Kesejahteraan Bandar, Perumahan dan Kerajaan Tempatan]

19. PR-1341-U71883

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum serta menyedari bahawa Lembaga Tabung Haji adalah sebuah institusi kewangan yang penuh dengan kejayaan dan amat membanggakan rakyat Malaysia khususnya umat Islam. Institusi ini juga menjadi contoh untuk negara Islam yang lain ikuti. Maka ianya mesti dijaga dengan penuh ketelusan dan amanah. Sebarang penyelewangan wajib diambil tindakan pantas dan menyeluruh dan jika ianya runtuh maka orang yang mesti dipersalahkan ialah Perdana Menteri."

[Perdana Menteri]

20. PR-1341-U71884

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum bahawa Yayasan Pembangunan Ekonomi Islam Malaysia (YaPEIM) sebuah pertubuhan yang mendapat sokongan umat Islam di Malaysia."

Yayasan ini tertegak dengan niat yang penuh suci bagi membangunkan ekonomi umat Islam di samping menolong mereka yang tidak bernasib baik. Oleh sebab itu sokongan berterusan dari individu dan institusi kepada Yayasan ini membuktikan umat Islam negara ini amat prihatin dengan apa yang terjadi dalam masyarakat Islam. Tetapi membiarkan segelintir individu mengambil kesempatan dari kejayaan Yayasan ini hendaklah dikutuk sekeras-kerasnya. Tindakan lembab oleh Menteri dan Kerajaan dalam memantau perjalanan kewangan Yayasan ini juga harus menerima celaan. Sepatutnya semua pihak yang membelanjakan wang YaPEIM bukan pada tempatnya walaupun 'legally right' tetapi tetap 'morally wrong', mesti bertanggung jawab dan meletakkan jawatan atas kadar segera."

[Perdana Menteri]

21. PR-1341-U71886

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum kehidupan rakyat makin dihipit dengan harga barangan yang makin naik dan tidak terkawal akibat pengenalan cukai GST dan pengecilan nilai Ringgit. Semua rakyat di setiap lapisan masyarakat amat merasai keadaan ini. Kerajaan harus bertindak berani seperti yang pernah dilakukan oleh Mantan Perdana Menteri Tun Dr Mahathir Mohamad bila negara menghadapi masalah ekonomi yang mencemaskan pada penghujung tahun 90an. Tindakan utama yang mesti diambil sekarang ialah dengan mengurangkan perbelanjaan di Jabatan Perdana Menteri dan Kerajaan mesti mengamalkan sikap berjimat cermat di semua peringkat pentadbiran negara."

[Menteri Kewangan]

22. PR-1341-U71888

Dato' Johari bin Abdul [Sungai Petani] akan mencadangkan:-

"Bahawa Dewan ini menggesa Kementerian Pendidikan mengambil langkah-langkah segera supaya pelajar-pelajar kita mempunyai pengetahuan dan kebolehan bertutur dalam banyak bahasa terutamanya Bahasa Inggeris, Arab dan Mandarin akan membantu pelajar-pelajar kita bila meninggalkan alam persekolahan dan universiti nanti. Bahasa ini amat luas digunakan dalam kegiatan harian dan perniagaan dalam negeri dan luar negara. Majikan pasti akan mengambil pekerja yang berkebolehan lebih dari satu bahasa, kerana ianya akan menguntungkan majikan dalam banyak aspek. Ketiga-tiga bahasa ini bukanlah sesuatu yang asing bagi kita. Kerajaan harus melihat bagaimana mengintegrasikan pengajaran bahasa-bahasa ini ke dalam sistem pendidikan yang sedia ada. Bayangkan seorang anak Malaysia fasih berbahasa Inggeris, Arab, Mandarin dan dapat mengungkapkan Bahasa Malaysia yang teratur. Sayang sekali apa yang kita sedia ada tidak dimanfaatkan untuk generasi akan datang."

[Menteri Pendidikan]

23. PR-1341-U71890

Dato' Johari bin Abdul [Sungai Petani] akan mencadangkan:-

"Bahawa Dewan ini mengambil maklum data jumlah pendatang asing yang berdokumen dan tidak berdokumen akan berbeza dari satu agensi kerajaan dengan agensi yang lain. Malah Menteri sendiri menjawab dalam Dewan Parlimen dengan menggunakan perkataan "ini anggaran". Ini bermaksud tiada siapa yang mempunyai data sebenar tentang berapa jumlah Bukan Rakyat Malaysia yang berada di sini. Ini amat membahayakan negara. Kerajaan mesti mengambil tindakan yang berterusan bagi mendaftar mereka yang tidak berdokumen. Tindakan mendaftar dengan mengambil tindakan undang-undang terhadap mereka adalah dua perkara yang berbeza. Yang penting adalah setiap manusia yang berada di negara ini mesti mempunyai dokumen. Tindakan segera mesti diambil dan mestilah berterusan."

[Menteri Dalam Negeri]

24. PR-1341-U72582

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Kesejahteraan Bandar, Perumahan dan Kerajaan Tempatan]

25. PR-1341-U72584

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan."

[Menteri Dalam Negeri]

26. PR-1341-U72589

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

[Menteri Pendidikan]

27. PR-1341-U72617

Tuan Chua Tian Chang @ Tian Chua [Batu] akan mencadangkan:-

"Bahawa Dewan ini akan menggesa Kerajaan untuk menegakkan prinsip berkecuali sebagaimana yang ditetapkan dalam Non-Alliance Movement (NAM) dan menegaskan bahawa Malaysia tidak akan mengambil bahagian atau menghantar askar untuk menyertai gabungan tentera yang dipimpin Arab Saudi dalam serangan terhadap Yemen, Syria atau mana-mana negara di Timur Tengah."

[Menteri Luar Negeri]

28. PR-1341-U72624

Tuan Chua Tian Chang @ Tian Chua [Batu] akan mencadangkan:-

"Bahawa Dewan ini menggesa Kerajaan untuk membantu penganggur dengan menyediakan bantuan kewangan secara tunai sebanyak RM1200 sebulan untuk tempoh 3 bulan selepas diberhentikan. Skim ini membolehkan pekerja-pekerja yang menganggur menjamin sara hidup mereka sewaktu mencari pekerjaan baru."

[Menteri Sumber Manusia]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

| <u>TAHUN 2015</u> | <u>RISALAT/DOKUMEN</u> | <u>TARIKH DIBENTANGKAN</u> |
|------------------------------|---|---------------------------------------|
| ST.170 | Laporan Tahunan dan Penyata Kewangan Lembaga (Penyelidikan dan Kemajuan) Perusahaan Timah Bagi Tahun 2014 | 17Mac 2016 |
| <u>TAHUN 2016</u> | <u>RISALAT/DOKUMEN</u> | <u>TARIKH DIBENTANGKAN</u> |
| CMD.1 | Laporan Tahunan Suruhanjaya Pasukan Polis Bagi Tahun 2014 | 17 Mac 2016 |
| ST. 8 | Laporan Tahunan dan Penyata Kewangan Lembaga Kemajuan Wilayah Pulau Pinang Bagi Tahun 2014 | 17Mac 2016 |
| ST.22 | Laporan Tahunan dan Penyata Kewangan Universiti Teknologi Malaysia (UTM) Bagi Tahun 2014 | 17Mac 2016 |
| ST.24 | Laporan Tahunan dan Penyata Kewangan Perbadanan Tabung Pendidikan Tinggi Nasional (PTPTN) Bagi Tahun 2014 | 17Mac 2016 |